

四庫全書

史部

欽定四庫全書

史部
禮部志稿卷四十六
四至

詳校官監察御史臣龔驤文

編修臣程嘉謨覆勘

總校官知縣臣楊懋珩

校對官學正臣翁樹棠

謄錄監生臣朱鎮

欽定四庫全書

禮部志稿卷四十四

明 俞汝楫 編

歷官表

精膳司郎中

黃裳 癸酉貢士

宋興 原仁 浙江淳安縣人 由監生官至河南布政司

葉蓁 監生

王士華 彦實浙江鄞縣人乙未進士

周濂 儒士

李柰 景春江西上饒縣人已未進士

陳律 正律江西永豐縣人乙丑進士

李和 時和直隸遷安縣人乙丑進士官至河南叅政

楊琛 叔獻直隸無錫縣人甲戌進士

何暹 景昇江西宜春縣人監生

周宗智 子正湖廣大冶縣人

倪輔良弼浙江平湖縣人甲申進士

高敞德廣直隸崑山縣人壬辰進士

周宏懋德浙江德清縣人乙未進士官至工部侍郎

張祥思履江西吉水縣人壬辰進士官至知府

金福天錫浙江黃巖縣人戊戌進士

胡玉伯堅直隸泰州人辛丑進士

尹萬化如川江西泰和縣人甲辰進士

翁健之應乾浙江餘姚縣人丁未進士官至廣東布政使

劉 準

直隸博野縣人官生

唐 禎

原善直隸華亭縣人丁未進士

張 潛

用昭陝西岷州衛人丙辰進士

劉 鈞

闕

陳 策

嘉言直隸無錫縣人癸丑進士官至
布政使

宋 冕

孔瞻浙江餘姚縣人壬戌進士官至
副都御史

張 繼

孟子醇浙江仁和县人乙丑進士官至
江西叅議

侯一元

應乾陝西泰安縣人戊戌進士

唐昇

啟東四川敘南衛人戊辰進士官至廣東韶州知府

何蒙

受之直隸泰興縣人辛未進士官至知府

侯綸

廷言山西太原左衛人辛未進士官至兵部左侍郎

張懷

德珍浙江餘姚縣人丁丑進士官至廣東參政

張鏜

廷進萬全都司人辛未進士官至江西參政

丘其仁

主靜福建莆田縣人丁丑進士官至潮州府知府

陸堂

肯堂直隸常熟縣人癸未進士官至副使

潘潢

薦叔直隸婺源縣人辛巳進士官至南京兵部尚書

方 瀾

思源福建莆田縣人丁丑進士調儀制司郎中

洪 伊

承志直隸歙縣人貢生

鄺 汴

子京直隸任丘縣人丙戌進士官至光祿寺少卿

呂 璋

尚德錦衣衛人癸未進士官至河南知府

歐陽龍

崇德江西泰和縣人丙戌進士官至南京工部侍郎

田 頊

希古福建龍溪縣人辛丑進士陞提學僉事

胡 松

汝茂直隸滁州人己丑進士歷官右副都御史仕至吏部尚書

徐 樾

子直江西貴溪縣人壬辰進士官至雲南左布政使

曹世盛

際鄉福建閩縣人己丑進士改吏部郎中陞廣西參政

王宗恒

季高直隸武邑縣人己丑進士

林

炫

貞孚福建閩縣人甲戌進士陞南京通政使參政

易寬

栗夫江西安福縣人乙未進士官至四川提學副使

胡東魯

望之河南鄆陵縣人癸酉舉人陞四川參議

張鈇

元賜山東冠縣人己丑進士官至陝西參政

高簡

公敬四川綿州人己丑進士改吏部文選司陞雲南參政

吳春

以容江西貴溪縣人戊戌進士改儀制司郎中陞光祿寺少卿

高尚志

德崇山東冠縣人壬辰進士陞陝西平涼府知府

張希舉

直隸江西南昌縣人辛丑進士官至湖廣右布政使

莫如忠

子良直隸華亭縣人戊戌進士改祠祭司陞貴州提學副使

傅學禮

立之陝西安化縣人嘉靖丙戌進士陞山東副使

薛應旂

仲常直隸武進縣人嘉靖己未進士官至浙江提學副使

張緯

朝文江西南昌縣人嘉靖辛丑進士改祠祭司

袁祖庚

見員外郎下官至按察司副使

方廉

以清浙江新城縣人嘉靖辛丑進士陞松江府知府

劉斯潔

原靜直隸易州人嘉靖丁未進士陞浙江參議官至戶部尚書

陰標

時準直隸容城縣人嘉靖辛丑進士陞河南參議

陳全之

粹仲福建閩縣人嘉靖甲辰進士改祠祭司仕至布政使

田揚

字籍見下繇本司陞改祠祭司郎中仕至參議

宋大勺

陞河南汝寧府知府山西提學副使

宋廷表

陞參議

徐學謨

子言直隸嘉定縣人嘉靖庚戌進士改祠祭陞荊州知府仕至本部尚書

況叔祺

吉夫江西高安縣人嘉靖庚戌進士陞貴州提學副使

李

纘

存孝福建晉江縣人嘉靖庚戌進士
改祠祭司仕至鴻臚寺少卿

雷金科

公憲福建建安縣人嘉靖癸丑進士

何汝健

體乾南京留守衛籍無錫縣人嘉靖
癸丑進士改祠祭司

劉曰材

汝成江西南昌縣人嘉靖癸丑進士

龐遠

惟明直隸吳江縣人嘉靖癸丑進士

姜子羔

宗孝浙江餘姚縣人嘉靖癸丑進士
仕至南京太僕寺少卿

余田

見員外郎下

柴涑

季東光祿寺籍浙江鄞縣人丙辰進
士陞山東副使

吳紹

見員外郎下陞廣東參議

包樾芳

子柳浙江嘉興縣人丙辰進士刑部調任調儀制司陞提學副使

戚元佐

希仲浙江嘉興縣人壬戌進士儀制司員外郎陞任陞尚寶司少卿

胡定

明仲湖廣崇陽縣人丙辰進士繇主客司員外郎陞任歷任左布政

楊俊民

伯章山西蒲州人壬戌進士繇儀制司員外郎陞任陞提學副使歷任戶

部尚書

查志立

鳴朝浙江海寧縣人丙辰進士繇祠祭司員外郎陞任調主客司歷陞副

使參政

王續之

大鄉四川南充縣人壬戌進士餘刑部郎中調任陞副使歷任左布政使

郭棐

見員外郎下陞知府歷任按察司

徐用檢

克賢浙江蘭谿縣人壬戌進士餘祠祭司員外郎陞任陞副使歷任南京

太常寺卿

陸光祚

見員外郎下調祠祭司歷任提學副使

高則益

見員外郎下陞參議歷任參政

王象坤

見員外郎下調祠祭司陞副使歷任左布政

金學魯

子魯浙江錢塘縣人戊辰進士餘工部調任陞湖廣副使

劉應麒

道徽江西鄱陽縣人

蔣勸能

見員外郎下陞湖廣叅議

章禮

見員外郎下陞江西叅議

王庭詩

見員外郎下陞副使歷仕湖廣布政使

祝教

子敷浙江山陰縣人丁丑進士繇祠祭司員外郎陞任降州同歷仕同知

錢若賡

見員外郎下陞臨江府知府

張淳

見員外郎下陞知府歷仕叅政

喬巖

巽甫河南商丘縣人辛丑進士由儀制司員外郎陞任陞副使歷仕叅政

張志

於道山東歷城縣人辛未進士繇主客司員外郎陞任調祠祭司歷仕參政

余寅

見員外郎下陞提學副使歷仕南京太常寺少卿

李同芳

濟美直隸崑山縣人庚辰進士繇主客司員外郎陞任調祠祭司陞提學副使

董嗣成

見員外郎下繇主客司補任調主客司建言削籍

王之猷

爾嘉山東新城縣人丁丑進士繇儀制司員外郎陞任陞穎州副使歷仕參政

甯中立

見主事下錄主客司員外郎陞任

張泰徵

懋同山西蒲州人庚辰進士錄儀制司員外郎陞任陞叅議

汪可受

以虛湖廣黃梅縣人庚辰進士錄主客司員外郎陞任陞知府

蔡逢時

應期直隸宣城縣人庚辰進士錄儀制司員外郎陞任調祠祭司陞副使

姜鏡

永明浙江餘姚縣人癸未進士錄主客司員外郎陞任陞知府削籍子羔

子

何喬遠

穉孝福建晉江縣人丙戌進士錄儀制司員外郎陞任調儀制司欽降布

政使經歷

張泰徵

字籍見上萬曆二十一年復任陞參議

張世才

見員外郎下復補儀制司降通判

李景元

見員外郎下陞河南副使

蔡宗明

稱舍浙江黃巖縣人己丑進士繇祠祭司員外郎陞任調儀制司削籍

袁茂英

君學浙江慈谿縣人丙戌進士繇儀制司員外郎陞任陞副使

沈儼爝

叔永浙江歸安縣人己丑進士繇儀制司員外郎陞任陞福建提學副使

周傳誦

見員外郎下陞湖廣副使

李叔元

端仁福建晉江縣人壬辰進士繇刑部山西司調任調儀制司

徐希孟

見主事下錄主客司員外郎陞任

陳其忠

公衡福建莆田縣人癸未進士錄南
京吏部復補以言事謫外任

梅守和

季方直隸宣城縣人戊戌進士錄主
客司員外郎陞任調儀制司陞河南

提學

陳鏞

見主事下錄主客司員外郎陞任陞
湖廣副使

陳于王

伯襄浙江嘉善縣人丙戌進士錄南
京文選司復除漆註湖廣副使

張嗣成

見員外郎下調儀制司

潘士達

去聞浙江安吉籍烏程縣人壬辰進
士錄祠祭司員外郎陞任

沈潢

見員外郎下
主客司員外郎陞任
陞福建叅政

顧自植

見員外郎下

馬應龍

伯光山東安山縣人
壬辰進士
錄主客司陞任

陳德元

叔仁浙江秀水縣人
戊戌進士
錄儀制司陞任

畢懋良

師鼻直隸歙縣人
乙未進士
錄南京吏部復補

秦道顯

如海河南洛陽縣人
乙未進士
錄主客司陞任

解經邦

見主事下
錄儀制司員外郎陞任

金應鳳

伯翔浙江山陰縣人
戊戌進士
錄主客司陞任

游漢龍

見員外郎下

賈之鳳

見主事下 繇儀制司員外郎陞任

馮曾欒

見主事下 繇儀制司員外郎陞任

王化行

二南福建閩縣人 丁未進士 繇儀制司員外郎陞任

王豫立

定甫陝西涇陽人 乙未進士 繇主客司員外郎陞任

鄭茂華

見員外郎下

莊祖誥

見員外郎下

楊作楫

夢符四川蓬溪縣人 丁未進士 繇主客司員外郎陞任

孫體元

見主事下錄主客司員外郎陞任

張光房

翁傳山西澤州人辛丑進士繇儀制司員外郎陞任

吳之甲

茲勉江西撫州府人庚戌進士繇工部添註

楊觀光

見員外郎下調祠祭司郎中

周應期

見主事下錄主客司員外郎陞任調儀制司郎中

員外郎

楊清

壬午貢士

萬完

克脩浙江仁和县人乙未進士

曾序 江西泰和縣人丁未進士官至廣
參議

萬祥 江西南昌縣人壬戌進士官至知府

張顯 仲達直隸江都縣人監生

李温 景和順天府鄆縣人庚辰進士

李麟 文祥順天懷柔縣人丁丑進士

陸淵之 克深留守中衛籍浙江上虞縣人丙
戌進士官至布政使

楊瑩 大潔山西蒲州人庚辰進士

金溥 儒士

周宏

見郎中下

徐說

以中直隸宣城縣人戊戌進士官至右通政

程愈

節之浙江淳安縣人辛丑進士官至參政

郝本

乙酉貢士

南鐘

彦聲陝西商州人甲辰進士官至河南左布政使南京太僕寺卿

戴恩

天錫直隸潛山縣人丁未進士

姚鏞

英之浙江慈谿縣人癸丑進士官至右都御史兼兵部侍郎總督兩廣

龍葵

皇甫錄

世庸直隸長洲縣人丙辰進士官至知府

宋毓

鍾秀山東德州人丙辰進士官至知府

陸昌

尚德直隸長洲縣人丙辰進士官至遼府長史

李從正

闕

陳策

見員外郎下

王晁

景昭直隸華亭縣人壬戌進士

劉瓚

朝重江西安福縣人乙丑進士

祝鑾

鳴和直隸當塗縣人戊辰進士

姜

龍

夢賓直隸太倉州人戊辰進士官至按察使副使

金

皞

治鄉

唐

鵬

雲鄉四川綿州籍直隸上海縣人甲戌進士

吳

仕

克學直隸宜興縣人甲戌進士官至參政

屠應

墳

文伯浙江平湖縣人辛未進士官至按察使副使

鄭

佐

時夫直隸歙縣人甲戌進士官至參政

高尚

賢

大賓河南新鄭縣人丁丑進士陞山東提學僉事光祿寺少卿

劉彭

年

性靜四川巴縣人甲戌進士官至副都御史

張鏜

見郎中下

董中言

慎己山東蒙陰縣人辛巳進士

王煒

克新直隸固安縣人辛巳進士官至按察使副使

李文中

甲子貢士

吳龍

允濟浙江孝豐縣人丙戌進士官至福建叅政

麥春芳

元實廣東南海縣人癸未進士

李邦直

汝司廣東茂名縣人癸未進士改吏部官至太僕寺少卿

毛渠

世澤山東掖縣人丙戌進士官至太僕寺卿

楊儀

夢羽直隸常熟縣人丙戌進士官至
兵備副使

許勉仁

希賢四川雙流縣人己丑進士陞按
察司僉事

衛元確

少乾廣東東莞縣人壬辰進士改儀
制司

劉曷

晉初直隸長淮衛人己丑進士陞山
東按察司副使

林應亮

熙載福建侯官縣人壬辰進士官至
戶部右侍郎

黃懋官

君辨福建莆田縣人戊戌進士官至
南京戶部右侍郎

王健

偉純浙江永嘉縣人戊戌進士官至
南京光祿寺少卿

周琬

潤夫湖廣應城縣人壬辰進士官至
僉都御史

劉文光

子實江西高安縣人戊子貢士歷官湖廣叅議

袁祖庚

繩之直隸長洲縣人辛丑進士

吳桂芳

見主事下

劉朝佐

道鄉江西安福縣人甲辰進士改儀制司歷太僕寺少卿

田揚

廷翰福建晉江縣人庚戌進士

宋大勺

字籍見下繇祠祭司陞任

賈衡

守準直隸東鹿縣人丁未進士

況叔祺

吉夫江西高安縣人庚戌進士陞本司郎中

郭東藩

鎮夫山東金鄉縣人丁未進士陞主客司郎中

余田

舜耕浙江崇德縣人庚戌進士陞本司郎中

龐遠

惟明直隸吳江縣人癸丑進士陞本司郎中

吳紹

汝復浙江秀水縣人己未進士陞本司郎中

嚴大紀

見主事下陞江西僉事歷仕太常寺卿

郭棐

篤周廣東番禺縣人壬戌進士陞本司郎中

陸光祚

見主事下陞本司郎中

高則益

汝謙江西南昌縣人壬戌進士陞本司郎中

沈玄華

瑞伯浙江秀水縣人壬戌進士陞儀制司郎中歷仕大理寺

伊在庭

見主事下改調南京兵部

穆文熙

敬甫直隸東明縣人壬戌進士繇工部補任調吏部陞廣東副使

張孟男

元嗣河南中牟縣人乙丑進士繇刑部復補改尚寶司司丞歷仕南京戶

部尚書

王象坤

子厚山西新城縣人乙丑進士繇主客司主事陞任歷本司郎中

王庭詩

見主事下陞本司郎中

蔣勸能

汝才浙江餘姚縣人乙丑進士繇主客司補任陞本司郎中

鄒學柱

國材浙江餘姚縣人戊辰進士繇儀制司主事陞任陞祠祭司郎中歷仕

山西左布政

章禮

見主事下陞本司郎中

支可大

有功直隸崑山縣人甲戌進士繇儀制司主事陞任陞主客司郎中歷仕

副使

蔣思孝

移之貴州普安籍應天溧陽縣人乙丑進士繇祠祭司補任陞主客司郎

中歷仕副使

錢若賡

德泰浙江鄞縣人辛未進士繇主客司主事陞任陞本司郎中

李楨

維鄉陝西慶陽人辛未進士繇祠祭
司主事陞任改光祿寺寺丞歷仕兵

部左侍郎

張淳

見主事下陞本司郎中

董嗣誠

伯念浙江烏程縣人庚辰進士繇儀
制司陞任陞主客司郎中

余寅

君房浙江鄞縣人庚辰進士繇工部
都水司主事陞任陞本司郎中

董基

繼可山東掖縣人庚辰進士繇南京
儀制司主事陞任改光祿寺寺丞歷

仕大理寺寺丞

于孔兼

元時直隸金壇人庚辰進士繇儀制
司主事陞任陞儀司郎中建言外謫

李開藻

叔玄福建永春人癸未進士繇戶部主事陞任隨陞提學僉事

王謙

子鳴浙江烏程縣人已丑進士繇祠祭司主事陞任

陳泰來

伯符浙江平湖縣人丁丑進士繇祠祭司主事陞任

張世才

德夫直隸山陽縣人已丑進士繇戶部主事陞任陞本司郎中

李景元

見主事下陞本司郎中

朱敬循

見主事下陞主客司郎中調儀制司調吏部陞太常寺少卿

周傳誦

叔遠陝西西安左衛人已丑進士繇儀制司主事陞任陞本司郎中

賴克俊

伯升福建晉江縣人乙未進士繇儀制司主事陞任陞主客司郎中

王紀

惟憲山西芮城縣人己丑進士繇儀制司主事陞任調儀制司陞主客司

郎中調儀制司

黃大節

思立江西信豐縣人丙戌進士繇主客司主事陞任陞祠祭司郎中

沈演

見主事下

李炳

虎文山西鎮西衛官籍岢嵐州人壬辰進士繇祠祭司主事陞任

樂和聲

爾律浙江嘉興縣籍桐鄉縣人壬辰進士繇祠祭司主事陞任

張嗣成

伯行山東萊陽縣人乙未進士繇儀制司陞任

鄭友周

仁甫山西定襄縣人壬辰進士繇祠祭司主事陞任

熊尚文

見主事下陞福建提學僉事

胡國鑑

正甫直隸宣城縣人壬辰進士繇儀制司陞任調吏部稽勲司

吳正志

之矩直隸宜興縣人己丑進士繇儀制司主事陞任改光祿寺寺丞

顧自植

見主事下

林茂槐

擢虛福建福清縣人乙未進士繇儀制司陞任

游漢龍

伯起直隸婺源縣人戊戌進士繇儀制司陞任

田大年

億伯湖廣江陵縣人壬辰進士繇刑部浙江司主事陞任

程再伊

連叔江西鄱陽縣籍直隸休寧縣人戊戌進士繇祠祭司主事陞任

鄭茂華

見主事下

莊祖誥

汝欽四川成都縣人辛丑進士繇儀制司主事陞任

徐謨

見主事下

楊弘備

無我江西南昌縣人丙辰進士繇祠祭司主事陞任

楊覲光

星甫山東招遠縣人丁未進士繇主客司主事陞任

石維屏

邦衛山東陵縣人辛丑進士繇兵部職方司陞任

周爾發

子祥福建同安縣人庚戌進士繇祠祭司主事陞任

王象晉

庚侯山東新城縣人甲辰進士繇行人司副使陞任

張國柱

維禎山東平原縣人庚戌進士繇主客司主事陞任

主事

官侑

丙子貢生

歐陽俊

甲戌進士

陳奎

甲辰進士

甘璫

宗華江西豐城縣人丁未進士官至知府

何瞻

民望浙江鄞縣人繇選貢監生景泰年奉使高麗

胡誠

曾卓

淪浙江西豐城縣人乙丑進士

楊瑛

德華福建莆田縣人已未進士

萬翼

覆之四川眉州人丁丑進士

謝弁

官生

魏佑

監生

王傳

乙未進士

金溥

儒士

宋端儀

孔時福建莆田縣人辛丑進士

馮允中

信道山東茌平縣人乙未進士官至兵備副使

胡積學

畏之四川巴縣人辛丑進士官至參政

商良輔

浙江淳安縣人官生

陳鎬

宗之南京欽天監籍浙江會稽縣人丁未進士官至副都御史

彭桓

景武江西吉水縣人丙戌進士

劉準

直隸博野縣人生員

董忱

世行直隸上海縣人丙戌進士官至知府

李璋

羅欽忠

允恕江西南泰和縣人己未進士官至
通政司左通政

王景

見員外郎下

劉滂

伯雨浙江慈谿縣人乙丑進士官至
太僕寺少卿

劉瓚

朝重四川會州衛人乙丑進士

徐明

文涉順天府大興縣人辛未進士

林炫

見郎中下

金皞

見員外郎下

張聰

鵠舉順天府大興縣人甲戌進士官
至南京戶部侍郎

臧應奎

賢徵浙江長興縣人丁丑進士

陸冕

子端直隸崑山縣人癸未進士官至按察使副使

鄭琬

德甫廣西儀衛司人癸未進士

王汝孝

紹甫山東東平州人丙戌進士歷官右副都御史

江曜

景昭浙江仁和县人官生陞祠祭司員外郎

王正思

仲行浙江餘姚縣人己丑進士官至建寧知府

皇甫濤

子安直隸長洲縣人壬辰進士陞本司員外郎

金清

廉夫應天上元縣人己丑進士改御史官至河南叅政

許穀

仲貽應天上元縣人乙未進士改吏部官至南京太僕寺少卿

來汝賢

子禹浙江蕭山縣人壬辰進士

李義壯

擢大廣東南海縣人癸未進士官至僉都御史

汪集

惟義江西進賢縣人乙未進士官至南京尚寶司卿

王宗恒

見郎中下

黃懋官

見員外郎下

張鈇

見郎中下

高簡

見郎中下

張維岳

克臣浙江杭州右衛人乙未進士陞祠祭司郎中仕至都御史

吳子孝

純叔直隸長洲縣人己丑進士官至湖廣叅政

唐穆

景文廣東瓊山縣人戊戌進士改儀制司

夏克承

惟德江西貴谿縣人官生

宋大勺

道成浙江餘姚縣人辛丑進士

萬士和

思節直隸宜興縣人辛丑進士仕至本部尚書

吳桂芳

子實江西新淦縣人甲辰進士仕至兵部尚書

宋廷表

廣西臨桂縣人丁未進士改儀制司

李 纘

存孝福建晉江縣人庚戌進士改祠祭司

徐文沔

可繩浙江開化縣人丁未進士改儀制司

羅 良

廬元江西萬安縣人癸丑進士

何 全

原學四川儀衛司籍溫江縣人癸丑進士陞貴州僉事

張佳胤

甫夫四川銅梁縣人庚戌進士官至兵部尚書

武 金

礪甫直隸井陘縣人癸丑進士

嚴大紀

汝肅太醫院籍浙江餘姚縣人已未進士錄行人陞任陞本司員外郎

徐廷祿

士敏直隸崑山縣籍太倉州人已未進士錄知縣陞任陞員外歷任叅議

滕伯輪

汝載福建甌寧縣人壬戌進士繇知縣陞任調吏部歷仕副都御史

王宜

時行福建莆田縣人壬戌進士繇工部調任陞主客司員外郎

陸光祚

與培浙江平湖縣人己未進士繇兵部復補陞本司員外郎歷仕提學副

使

胡僖

伯安浙江蘭谿縣人己未進士繇儀制司復補陞祠祭司員外郎歷副使

伊在廷

繼美應天籍吳縣人己丑進士繇刑部主事復補陞本司員外郎

王庭詩

言鄉陞陞本司員外郎乙丑進士繇知縣

齊康

太和直隸永年縣人壬戌進士

王鼎爵

家馭直隸太倉州人戊辰進士繇刑部調任陞儀制司員外郎歷仕提學

副使

宋儒

景濂直隸定州籍貴州麻哈州人辛未進士繇庶吉士補任

曹大埜

仲平四川巴縣人戊辰進士繇戶部給事中調任陞祠祭司員外郎歷仕

江西巡撫

章禮

約之浙江會稽縣人戊辰進士繇大理寺副陞任陞本司員外郎

張淳

希古直隸桐城縣人戊辰進士繇知縣行取補任陞本司員外郎

陳述齡

子壽湖廣沔陽州人甲戌進士繇戶部復除陞祠祭司員外郎

耿鳴世

戊謙山東新城縣人戊辰進士繇御
史陞任陞儀制司員外郎歷任參議

張坤

伯簡湖廣鍾祥縣人癸未進士陞儀
制司員外郎

甯中立

爾強河南潁川衛人癸未進士繇庶
吉士改任陞主客司員外郎

俞士章

汝成直隸宜興縣人癸未進士繇知
縣行取補任陞儀制司員外郎歷任

參議

安希范

小范直隸無錫縣人丙戌進士繇行
取陞任改南京吏部

張鳴岡

治禎江西萬安縣人庚辰進士繇御
史陞任改光祿寺寺丞見任大理寺

少卿

李景元

乾吉直隸大名縣人己丑進士錄戶部調任

朱敬循

叔理浙江山陰縣人壬辰進士錄刑部調任

熊鍾文

質鄉江西南昌縣人壬辰進士錄刑部調任

鄧光祚

日昌廣東曲江縣人己丑進士錄知縣陞任

文選司郎中

徐希孟

仲輿直隸丹徒縣人乙未進士錄刑部調任

中

沈演

伯甫浙江烏程縣人壬辰進士錄工部調任

吳

默

言歲直隸吳江縣人壬辰進士錄兵部復補陞祠祭司員外郎

陳

鏞

汝直浙江餘姚縣人已丑進士錄行人陞任

祁光宗

伯裕直隸滑縣人戊戌進士錄工部虞衡司調任陞主客司員外郎

熊尚文

益中江西豐城縣人乙未進士錄刑部河南司調任

馮 烜

居方浙江慈谿縣人壬辰進士錄兵部職方司除補陞主客司員外郎

吳 化

敦之湖廣黃安縣人乙未進士錄主客司補任

李 瑾

仲魯山西襄陵縣人乙未進士錄知縣行取陞任考選工科給事中

顧自植

公主直隸吳縣人壬辰進士錄刑部四川司調任

王光經

景濟浙江永嘉縣人丁未進士

解經邦

叔憲陝西韓城縣人乙未進士
部復除

賈之鳳

儀虞山西陽城縣人戊戌進士
部都水司復補

李徵儀

于來直隸廣德州人辛丑進士
西清江縣知縣行取

馮曾楷

伯構直隸金壇縣人甲辰進士
南開封府推官行取

萬廷搢

無執江西南昌縣人甲辰進士
隸肥鄉縣知縣行取

蒯諫

信鄉陝西寧夏衛籍直隸定遠縣人
戊戌進士
部復除

孫體元

復一山東濱州人辛丑進士
部復補

鄭茂華

實符直隸江都縣籍福建莆田縣人
丁未進士繇中書舍人陞任

蔣一驄

擢仲浙江餘姚縣人辛丑進士繇行
取兵部復除

熊文燦

大濛貴州永寧衛籍四川瀘州人丁
未進士繇湖廣黃州府推官行取

徐鏞

元範直隸吳縣人辛丑進士繇兵部
復除

莊廷臣

龍祥直隸武進縣人庚戌進士繇浙
江永嘉縣知縣陞任

桂紹龍

驥雲江西金谿縣人丁未進士繇行
人司行人陞任

周應期

克昌浙江永興縣人已未進士本年
選任

王曰善

惟果湖廣江陵縣人丙辰進士繇直
隸邯鄲縣知縣行取

吳羽文

長卿江西南昌縣人癸丑進士繇兵部武選司調補

鄭國昌

遊聖陝西邠州人丁未進士繇工部都水司調補

沈景初

君復浙江餘姚縣人癸丑進士繇江西進賢縣知縣行取

李芬

君實江西臨川縣人丙辰進士繇中書舍人行取

王任杰

四川合江縣人丙辰進士繇北直滑縣知縣陞任

附禮部精膳清吏司題名記

明興稽古並建六官官至尚書一人左右侍郎二人

郎中員外郎各一人主事二人其下府史胥徒有差

以贊邦治其後禮分四部曰儀部祠部客部膳部既
嫌同洪武二十有九年乃著令諸子部通為司而膳
部為精膳清吏司云後又稍變置文皇帝嗣承先烈
兩都相望改正官制制惟舊故今曹名如留都故弗
異云職司省約視他司頗稱簡暇故近日議省其主
事員嗟乎國家養賢竝用其猶藝材待任矣何弗廣
也彌歷歲年官者靡述豈不稱闕哉嘉靖乙未余攝
官茲曹慨焉乃披覽牘籍追觀前人政事見其所掌

如辨賓客之等與其餼達諸司之節與其數掌膳夫
登下程食羞差品而攷其詐諼制其出納而又月有
月要歲有歲成以關尚書而詔帝歲陽至裡祀慶成
以議豐殺以正班列以襄佐大禮他諸細務又往往
而攝斯其官可省哉而況生民之禮肇始飲食周官
之典詳於式法良以膳羞有生之大欲恭儉王者之
鉅行故夫禮不可以莫之講也今上自帝后妃主下
逮閭尹婦寺以洎鳥獸昆蟲之細莫不食大官使蕩

而無節則淫荒冗濫陵夷而不禦矧乎人主深居法
宮侈心易長狗馬嬖御之奉何可厭也有一於茲膳
司必以禮節亦所以奉太上之烈遵先王之度而納
民於軌物也將不在茲乎將不在茲乎今幸值明
主中興動必以禮而又屏放嬖倖斥遠靈怪雕題緩
耳之君髻首貫胸之長咸皆省諭德心浸淫言化無
敢以異禽封獸貢獻闕庭者故今觀魏肅清禁籟岑
寂參奴牧隸呻吟憔悴吾儕小人得以從容退食與

海內澹然甚大幸也於是表載前列刻之貞珉後有
君子得以考覽焉嘉靖十七年戊戌仲夏穀旦胡松
撰

貴溪吳子官禮部精膳司郎冠高子繼之高安劉子
員外郎瓊山唐子主事約典歸誼靡愆靡忒迺以暇
日備考先達列官茲署者為百五十有一人勒名于
石以昭來鑒走問東涯子東涯子題之曰四君子是
舉也其有夙夜匪懈之思耶夫膳者善之義司者主

之稱名者實之對碑者永之道也周禮膳夫掌王之
食飲膳羞以養王及后世子而宰夫贊小宰比官府
之具凡朝覲會同賓客以牢禮之法掌其牢禮委積
善獻飲食賓賜之殮牽與其陳數其所以為之節者
蓋其詳矣我國家以光祿隸禮部而膳司主之即周
禮以膳夫掌膳羞而宰夫復掌其禮事之意也周禮
宰夫屬家宰而國家膳司則屬之宗伯宗伯典禮言
有專焉重之也惟天子南面而治饗四海報養燕勞

饋子以來四方不移不嗇不夷墮于防禮所生也而
精義之蘊亦無乎不在豈籩豆之飾品物之羞而可
以語所司哉今觀百五十有一人者蓋自永樂稱行
在部以至今日時不同而官同官不同而所司同類
多克舉其職蜚聲郎署荐服大僚卓然為名世臣其
或沮於梗槩靡究所施見訾公議爰疚厥祿者亦各
存其名類而題之攷其實而鑒戒昭矣且今仕者往
往重京朝官京朝官職有銜秩有階祿有稽其入對

也有籍蓋名無不題而碑焉非此無所託以有永也
夫舉所司以為守而陳往迹以比類賢不賢皆可指
而言也間亦有號稱通顯而心蹟可疵靡竟所施而
貞介可範者四君子當自得之後之觀今亦猶今之
觀昔也故曰是舉也有夙夜匪懈之思焉乃復貽之
箴曰巍巍帝闕百辟承之翼翼蘭省天祿是司罔滔
罔酒令德令儀爰有大饗宇饋是羞貢篚來廷亦罔
不柔奉我天度守我天常肅肅大夫鑒往惟良鳴佩

鏘鏘大夫至止載瞻于碑其道如矢一讀而僂再讀而俯三讀以思協我規矩直清其德曰為古師古人在列敢告司碑嘉靖二十五年丙午季冬朔日萬逮撰

凡署皆有題名司故有之且再矣官是者遞遷遞至則遞而勒石歲久而復盈自予來承乏於茲考其名若郎中則李乾吉員外郎則周淑遠主事則鄧日昌而後闕弗載矣今更伐一石次序題之而營其隙地

以待來者修故事也既成碣於廳事之左制如初于
是同舍相與縱觀各以所聞見稍稍尚論因舉手澤
石曰是硌硌者庶託不朽乎詰者曰然結繩勿論自
唐虞而下若九官十六族奮庸熙載號能其官者代
不少若而人名至今存也其石安在彼湮滅不稱者
不可勝數何必乏此一片石耶皆相顧改容曰子無
乃稱吾曹識之矣因為之記若夫明職業考善敗以昭鑒
戒則向者胡萬兩先生之言具在萬歷壬寅夏梅守和題

禮部司務

滕霄

河南汝州人由本部祠祭司員外郎調任知府

陳珪

正統四年任

周濂

正統五年任

雍順

監生正統十三年任

何懷

景泰五年任

何源

江西建昌縣人舉人天順元年任

張本

監生天順八年任

王大經

舉人成化二年任

時中

舉人成化五年任

金鍾

浙江青田縣人舉人成化五年任

劉琛

監生成化八年任

王均美

舉人成化十四年任

余鏞

廣東順德縣人舉人成化二十年任

劉鈞

舉人成化二十一年任歷陞本部精膳司郎中

方佐

舉人成化三十三年任

郝本

舉人弘治三年任陞本部精膳司員外郎

戴儼

舉人弘治六年任

奚頊

舉人弘治九年任

鄺郊

舉人弘治十二年任

王思

舉人弘治十五年任

程鶚

舉人弘治十八年任

劉秉常

舉人正德六年任

陳端甫

直隸武進縣人舉人正德九年任陞儀制司員外郎廣東僉事

陳濟

舉人正德十二年任

李輔

舉人正德十二年任

李瑜

江西吉水縣人嘉靖三年任調吏部
陞禮部主客司員外郎郎中四川參

議副使太僕寺卿

范韶

直隸寶應縣人舉人嘉靖二年任陞
戶部員外郎郎中浙江參議

洪伊

直隸欽縣人舉人嘉靖三年任調吏
部陞禮部精膳司員外郎郎中

王胤

浙江永嘉縣人舉人嘉靖八年任陞
兵部員外郎郎中貴州參議

胡東魯

河南鄆陵縣人舉人嘉靖九年任復
除兵部調吏部陞禮部精膳司員外

郎郎中四川參議

何 勗

湖廣江夏縣人舉人嘉靖十年任陞戶部員外郎郎中姚安府知府

陳 灝

直隸山陽縣人舉人嘉靖十年任調吏部陞刑部員外郎郎中

楊美冕

浙江鄞縣人舉人嘉靖十一年任陞工部員外郎郎中

胡 瀚

河南內鄉縣人舉人嘉靖十五年任陞戶部員外郎郎中

羅 淮

浙江慈谿縣人舉人嘉靖十七年任調吏部陞兵部員外郎郎中

井 震

河南洛陽縣人舉人嘉靖十八年任陞戶部員外郎郎中廣西知府

吳夢麟

順天府通州人舉人嘉靖十八年任

徐應奇

舉人嘉靖十九年任陞廣西知府

李世德

河南祥符縣人舉人嘉靖二十五年任調教諭陞國子監助教南京戶部

主事

陳銓

直隸邯鄲縣人舉人嘉靖二十七年任

方興邦

福建莆田縣人舉人嘉靖二十九年任調吏部歷陞兵部武選司郎中

吳崧

山東德州人舉人嘉靖三十四年任陞戶部湖廣司員外郎

茹子嘉

山西澤州籍貴州人舉人初任翰林院孔目嘉靖三十五年陞任陞工部

虞衡司員外郎

吳讓

江西浮梁縣人舉人初任都察院司
務嘉靖三十八年復除

劉承恩

山西襄垣縣人舉人嘉靖三十八年
任

吳桓

直隸吳縣人舉人初任易州學正嘉
靖三十八年陞任

康憲

福建長汀縣人舉人嘉靖四十一年
陞任調吏部

林啟昌

福建莆田縣人舉人國子監學正嘉
靖四十三年陞任

周應

廣西全州人舉人翰林院孔目嘉靖
四十三年陞任

王道立

直隸太倉州人舉人國子監學正嘉
靖四十三年任

蕭自脩

陝西高陵縣人舉人國子監學正隆
慶元年任陞戶部員外郎四川夔州

府知府

李載贄

江南廬江縣人舉人國子監學正

劉師顏

雲南人

裴守一

山西長子縣人舉人

程道淵

江西樂平縣人舉人萬曆十年任陞刑部山西司郎中

鐵世林

雲南永昌衛籍浙江杭州府人舉人萬曆五年任

高薦

湖廣石首縣人舉人萬曆十年任陞戶部浙江司員外郎陞副使

王崇雅

山西蒲州人舉人萬曆十一年任陞戶部貴州司員外郎

黃應奎

浙江錢塘縣人舉人歷南京國子監學正萬曆十六年任二十三年陞刑

部陝西司員外郎

郭棟

河南安陽縣人舉人萬曆十七年任

徐文斗

江西彭澤縣籍建德縣人舉人歷南京翰林院孔目萬曆二十三年任

夏思

直隸廣德州人舉人歷南京國子監學正萬曆二十三年任

熊裕

江西南昌縣人舉人歷國子監學錄萬曆二十四年任

衛廉

山西猗氏縣人舉人歷翰林院待詔萬曆二十五年任

黃彬

江西南城縣人舉人歷國子監學正萬曆三十一年任

鄔應薦

湖廣沔陽州人舉人繇國子監學正萬曆三十六年任

李文綬

福建晉江縣人舉人繇國子監學正萬曆三十三年任

潘龍

貴州赤水籍浙江海鹽人舉人禮部司務萬曆三十六年任

劉孔祿

江西安福縣人舉人翰林院待詔萬曆三十九年任

附司務題名碑記

廳事題名其典不見於周漢之策後人倣年表而起
義端有作者今中外諸司凡涖政之所往往有穹碑
夫士大夫入官涖事晨宵所直精神所寓恒積歲而

後去去之日邈無所繫於其故乃其數歲之間所以
殫慮凝矚以毗一時之政令者遂無以託於方來而
方來之論世者則又歎於文獻之不足昔賢所為是
非沿古而義實有裨者此碑是也禮部暨四司皆有
碑而司務廳事尚缺司務綜領四司之文案稽覈出
納以贊大卿之政任劇而職專聖祖特賜敕以優之
廳事之有敕惟此官為然以故守是官者常久於其
位精神所寓視他為深春卿掌禮儀文案之政令其

文獻尤宜有所託以示後邇情宣德辛亥廳事落成
迄今百九十年矣茲欲考其官於此者則黯然莫存
將與形響而垂盡有志之士能無興懷嘉靖甲寅甫
田方君為司務雅抱斯志會遷未果己未秋浮梁吳
君至撫感前修思任其事頃之姑蘇吳君至儀與協
祠署徐大夫嘉兩吳君之有志也署有巨石舉以贈
之於是兩吳君蒐閱故牘濟以諮詢得四十四人姓
氏歲籍畧備乃銓次登石以樹於廳事之左隅而屬

余記其歲月嗟夫彼四十四君者方其注神殫力思以夙夜之勤勞流聲永譽孰知其名之無所寄以永存也百九十年之間時移政熄遠者飄風近者駒影又孰知有兩吳君者踵出為之表其懿也且一石之建制無所嫌而義資於政乃歷百九十年而莫克舉豈其思之匪存哉夫亦以創始之難而稽往之遠也今兩吳君踊奮而功集博搜而牘全肇曠儀以彰往秉逸獻以裕來二君之志則遠矣余惟古之修墜典

而表前聞者即以厥修而自貽令問二君所藉以不
朽者豈惟茲石哉謹記賜進士出身禮部祠祭司郎
中華亭楊豫孫謹撰

禮部志稿卷四十四

欽定四庫全書

禮部志稿卷四十五

明 俞汝楫 編

奏疏

類奏疏

凡類奏內條款不關禮務者不錄

陳三事疏

洪熙元年禮部左侍郎胡濙言十事內三款

闕

曰篤親親書曰克明俊德以親九族九族既睦平章百

姓又曰立愛惟親立敬惟長始于家邦終於四海惟陛下于宗親誠能推恩義以懷之分寶玉以遺之則親親恩篤而天下化矣

曰親經史謂經以載道可以觀帝王致治之本史以紀事可以鑑前代興王之繇伏願萬機之暇法乾行健繼離向明常接儒臣講論經史則聖智益博睿謨益廣而與二帝三王同一揆矣

曰嚴祀事書曰鬼神無常享享於克誠仲尼曰祭如在祭

神如神在近見各處應祀神祇壇廟傾頽棲神無所甚
失國家所以祀神之道乞令所司以時修葺此有國家
之大事也疏上上嘉納之

覆行三事疏

正統二年八月河南布政司李昌祺言三事

一城市鄉村舊時俱有社學近年廢弛即令各按察司
添設僉事專督學政乞令府州縣正官量所轄人戶多
寡創修社學延師訓之遇儒學生員名缺即於社學無

過犯高等子弟內選補庶得學業易成

一近者禁約僧尼誠為厚俗首務比見河南各府縣衛
所有軍民男婦自稱端公師婆托神惑衆人有病不事
醫藥惟飲符水以故死常八九傷人壞俗尤甚僧尼乞
嚴加禁治再犯及邀請容隱者悉罪之

一前代忠臣烈士載在祀典若宋丞相文天祥授仕於
傾危之際脫身於俘執之中倡義勤王艱難萬狀功雖未
究忠則有餘竟能取義成仁從容就義為千萬世臣子

之式而鄉無時祭諡之美稱人皆嘆惋以為缺典乞准
察張巡許遠例頒降祭文儀注令吉安府支給官錢收
買牲醴春秋正官於廬陵祠堂行禮仍乞追賜美諡表
顯忠貞以勸來裔上嘉納之命行在禮部會官議行

議行五事疏

正統七年國子監祭酒李時勉言五事

一聖朝科舉之設皆欲得人以資任用未嘗有輕重分
也比繇教官九年考滿以舉人有無多寡為黜陟遂重

科舉而輕歲貢第以次起送不復論其學之淺深及貢
入監考其大義十無一二可否各衙門取撥厯事多不
諳書筭又有貌陋老病者虛費朝廷作養乞今後歲貢
生員務選資質端重通曉文義書筭者充貢其愚劣貌
陋者悉黜為民教官考滿歲貢皆中科舉雖不及數亦
本等用科貢俱中者陞用科貢俱不中者降用如此則
科貢俱重而人才輩出

一撥歷監生永樂間俱以入監年月為先後厥後祭酒

陳敬宗奏准以坐監年月為先後而兩監邇年仍以入
監年月為先後以此丁憂省祭之徒在家延住七八年
者有之十餘年者有之詐稱丁祖父母或繼母嫡母憂
有司朦朧保結比至入監即得取撥倣倣成風不可遽
止乞今後惟依實坐監年月淺深以次取撥其丁憂省
祭之類俱不作數如此庶勤怠有所懲勸虛詐無繇倣
尤

一歲貢中式生員分撥南北二監肄業已有定例緣本

監各衙門取撥辦事歷事數多監生不敷兼在監諸生
多年老少諳書算乞今後歲貢生員四十以下告願讀
書者存留本監以備取撥

一醫學所以療疾全生不為不重本監雖有官醫二名
每遇監生患病省令醫治緣無官給藥材多有艱難不
能措辦乞勅太醫院量給藥餌陸續送監收貯監生有
病令醫者對症修治

一近年有俗儒假托怪異之事飾以無根之言如剪燈

新話之類不惟市井輕薄之徒爭相誦習至於經生儒士多舍正學不講日夜誦憶以資談論若不嚴禁恐邪說異端日新月盛惑亂人心實非細故乞勅禮部行文內外衙門及提調學僉事御史并按察司官巡歷去處凡遇此等書籍即令焚毀有印賣及藏習者問罪如律庶俾人思正道不為邪妄所惑詔下禮部議尚書胡濙等以其言多切理可行但欲取太醫院藥于本監治病原無舊例難從上是其議

覆行三事疏

正統七年直隸大名府內黃縣掌縣事知州宋安言三事

一各處迎詔官員俱乘騎于儀從前導引禮曰下公門式路馬况詔勅降龍亭在後臣子何可乘騎前驅乞勅自後官員迎詔俱于儀從前步行導引老疾艱于捷步者許于龍亭後乘騎隨行

一各處故官多有不肖子孫將父祖所遺紗羅紵絲錦

綺衣服鬻於樂人及假鄉村報賽男婦粧飾作戲古人
雖貧不鬻祭器况父祖遺衣乎乞勅該部移文禁止
一禮曰隣有喪春不相里有殯不巷歌今各處愚民有
遭父母兄弟之喪殮葬之期宰牲筵款弔祭姻朋甚至
歌唱以恣歡乘喪以嫁娶者傷風敗俗莫此之甚乞勅
該部嚴禁約之上命該部議行

議覆四事疏

成化十一年正月國子監祭酒周洪謨言四事

一今臣庶祠堂之制悉本家禮高曾祖考四代設主俱自西而東考之神道古無其說惟我太祖高皇帝太廟之制允合先王左昭右穆之義宜令一品至九品止立一廟但以高卑廣狹為殺神主則高祖居左曾祖居右祖居次左考居次右於禮為當

二在外衙門時節行禮宜令致仕官與有司官依品級高下序列班次

三天下府州縣學祭先師孔子多有禮無樂宜令禮部

以樂歌之詞舞佾之數行下有司置造樂器俾士子以時習肄

四欽天監所臧選擇歷書係洪武間謨定頒行今民間不見此書宜遵舊制刊布天下事下所司議聞禮部覆奏洪謨所言祠堂之制乞命翰林院參酌更易具奏處置所言在外行禮班次緣致仕與見任同乞通示天下遵守及受封官亦合與致仕同所言學校祭祀先師合用樂舞緣樂歌八佾舞用人數多而州縣學生數少乞行天下

止令俟豐稔之時補造樂器所言頒行選擇歷書乞令
欽天監印造遇陰陽學官赴監聽考者人給一本使與
官民之家遵用從之

覆奏四事疏

弘治元年禮部覆奏左都御史馬文升所奏四事其曰
逐術士者宜令各該巡城監察御史及五城兵馬司并
錦衣衛巡捕官逐一搜訪但有扶鸞禱聖驅雷喚雨捉
鬼耳報一切邪術人等及無名之人俱限一月內盡逐

出京仍有潛住者有司執之治以重罪主家及四鄰知而不舉者連坐其曰清僧道者宜令兩京僧道錄司并天下諸司通查勅建勅賜并古刹共若干所給度僧道共若干名備造文冊送部存照仍將十年一度之例停止待額數不足之日所在官司照額起送給度內外衙門不得指以救荒納粟為繇奏請給度違者科道糾之其有擅自修葺者即便拆毀如無度牒僧道行童發回當差敢有私創寺觀及容隱僧道行童者僧道官并住

持俱發附近衛分充軍所司官員不舉以枉法論其曰
懷四夷者今後入貢夷人筵宴宜令光祿寺堂上官一
員提調要務豐潔本官差官一員督察其朔望并陞辭
酒食令該日侍班御史巡視但有尅減菲薄者將光祿
寺官并局長等究問其曰節財用者成化四年以前每
歲用甘松等料共千六百三十五觔以後增至千八百
八十五觔十一年後又增至二千八百六十五觔雖稱
各年間拖欠本部亦已累行催納緣俱係民間出辦差

人解運勞費實多其光祿寺供用牲口正統年間每年各色數止四萬至天順間漸增數多成化元年奏准每年不過十萬十六年以雞三千折豬三千鶩五百折羊五百添派湖廣等處買辦以小易大價過十倍况近年以來各處凶荒人民艱食乞將內府供用庫二次增添香料數內量減一二光祿寺牲口願納雞鵝者免其折納豬羊仍於十萬數內量減以蘇民困上曰所言皆是逐術士爾部中仍出榜禁約香料照成化四年數解納

折納猪羊令光祿寺計算以聞

陳七事疏

弘治二年禮部尚書耿裕等以災異言七事

一寅畏天戒謂自元年三月至二年六月各處報奏天鳴地震地陷山崩風雷雷雨白毛黑氣等項災異不止二三十次其大水滄沒田禾人畜係戶部抄行者猶不在此數天心仁愛一至於此先帝大祥已屆禫除有期陛下孝思之心當於此而益加切防微之慮當于此而

蓋加審倘左右之人有先意逢迎導聲色而倡遊觀通
禱祠而進珍玩者宜痛絕之庶以盡今修省仰答至誠
一省減貢獻謂各處鎮守內官與掛印總兵官今後遇
慶賀萬壽聖節各仍舊進馬二匹不許過多其副總兵
叅將協守分守守備內外官俱不許進貢科擾違者許
叅奏究治

一停止折納謂雞猪鵝羊其價多寡不倫乞令光祿寺
止折納猪三千口羊五百隻其鷄鵝仍舊解納為便

一革退軍厨謂光祿寺厨役原額六千三百八十四名
成化十一年奏添五百名二十三年太監山青又奏添
一千名每名月食糧一石又日支白米八合濫費無已乞
將青奏添之數悉令革退遇大庖厨等處缺役即于原
額厨役內揀選僉補以後內外官不許輒奏收役

一慎重教職謂今後教職請仍舊止于科貢二途出身
者考授其餘納粟出身者不許濫與

一均平取士謂今後會試取士請仍舊照宣德年所定

南北中之數南取六北取四中取二以為常

一改調官員謂今後有與王府結親官員除護衛儀衛司軍職照例不必改調其餘不分軍民職官但在一城居住者請俱令照例改調或致仕閒住上曰寅畏天戒是防微杜漸之意朕當體行光祿寺折納猪准減一千口軍厨仍舊其餘皆准行

覆奏三事疏

弘治二年禮科給事中王綸陳十事內三款曰廣科目

以崇文學者謂我朝三年一開科解額有限取士之途
尚未廣乞斟酌量添名數其歲貢生之為訓導者三年
後宜考選許其鄉試曰去淫邪以敦大化者謂京師西
山四月八日有香山之會正月十五有戒壇之會男女
混狎乞嚴禁之曰嚴遴選以得真才者謂各處歲貢生
員俱以食糧年深輪充取之既不精及赴禮部願就教
職者試于內廷又多傳遞懷挾之弊乞慎擇之于先痛
革之於後庶教職漸可得人下禮部覆奏以為方今鄉

試舉人數額比舊已多難再增加歲貢生已就教職者亦不許與在學生徒一概奔走鄉試餘所言多可採用其曰體天心修實德者惟皇上尤加之意上從其議

看詳三事疏

弘治四年鴻臚寺右少卿李鏊應詔言十二事內三款一定禮制諸司職掌所載冠禮止有親王而東宮者不載婚禮止有親王公主而東宮者不詳及建立東宮冊封親王幸太學畊藉田上徽號等禮又皆不錄乞勅禮

部取近年行過儀注并廷試進士面諭大臣天下諸司朝覲諸未脩禮儀逐一議處得宜或續于職掌之後或別為一書與職掌並行

一置齋房每大祀時分獻陪祭等官俱無齋房臨時借居道士房榻貴賤雜處且宣召不便乞勅工部於壇內空地做天壽山朝房體制蓋造齋房

一禁邪妄乞勅工部毀戒壇勅禮部都察院禁僧人坐禪打會奉錄受戒等事下所司看詳以聞

議覆六事疏

弘治四年南京國子監祭酒謝鐸言六事

一曰擇師儒謂願求道德之士如唐之韓愈宋之揚時者以為太學師又必得廉靜恬退嚴重剛方之士為各布政司提學憲臣庶無負教化之實

一曰慎科貢謂今之所當科舉者雖可得豪傑之士亦間有虛浮躁競之風其所習多俗儒纂錄支言長語不知經史大義乞一切禁絕今之所謂歲貢雖稍勝輸粟

之徒亦多因循姑息之弊其補廩或以家貧久次乞憐而得宜痛加裁革庶幾升于國學皆可任用

一曰正祀典謂孔廟未從祀者若龜山先生楊時乃伊洛正傳息邪放淫以承孟氏宜進已從祀者若臨川郡公吳澄受宋之恩如此其久歷元之官如彼其榮迹其所為曾不及洛邑之頑民宜黜乞升時以上附宋諸賢之位黜澄以下從莽大夫之列則于世教不為無補

一曰廣載籍謂本監書板舊多藏貯散在天下未免有

遺乞勅各布政司凡係經史書板盡送南京國子監以復國學儲書之舊免有司贈饋之勞

一曰復會饌謂宜修饌堂以便往來造器皿以供日用
一曰均撥歷謂科貢多而納粟少十分中乞以六七分屬科貢三四分屬納粟庶得變通之義下禮部覆議謂鐸所奏深切時弊俱可行但欲黜吳澄升楊時從祀先此已屢有陳奏具難別議從之

陳八事疏

弘治四年禮部尚書耿裕等應詔陳八事

一曰尚勤儉謂勤則心不他役政事不怠聖學無間儉則志不外奪用度裁省物無妄費皇上自即位以來勤儉著聞惟日慎一日不替初心則可以感格天意

一曰議宗室謂天下王府冊封婚葬居第食祿等費皆出內帑與下民供億本部查自今年正月至四月郡王將軍下至夫人儀賓受封薨逝已八十餘人夫天下地有定所賦有定額加之水旱頻仍人民凋耗而宗室之

費日增計三月數尚如此一年可知推而至於百年之久又將焉出宜下文武大臣會議務為善後之計

一曰減齋醮謂皇上臨御之初禁止齋醮雨雪未見愆期比因雨雪不降啟建禳熒齋醮動經旬月所費不貲茫無應驗以初時禁止較之啟建祈福誠為無益宜仍禁絕以除姦蠹

一曰汰冗員謂官多則民擾而增設衙門百費紛起尤為不便本部自去冬十月至今歲四月僅半年間該鑄

開設衙門印信關防銅牌已八十有餘似此增設無歲無之乞命吏部查天下添設官員及新增衙門凡有冗濫悉加裁省

一曰省供應謂山東河南北直隸等處連年亢旱民多逃亡宜將光祿寺奏派各處猪羊雞鵝弘治五年前所欠悉與蠲免其已徵未解價銀發災傷處賑濟弘治六年七年停免原派之半俟年豐補納庶民困少蘇

一曰免厨役謂太常寺新僉山東河南北直隸厨役多

難起解緣其地災傷僉解費廣俱累里甲乞悉令停止
以少安人心

一曰罷營造謂天時亢旱軍民憂惶土役繁興人力困
憊祖宗陵寢固不可不修至於浣衣局果園溝渠河岸
等役皆可少緩宜命督工官將完者趨完未興工者即
皆罷之

一曰止差遣謂近年降人押送兩廣或差部屬或進士
或通事初無定例而通事在外越禮犯分往來騷擾自

今但差兵部屬官及行人為便疏奏上曰所言是尚勤
儉朕當自勉議宗室汰冗員仍會官議處齋醮即令停
止供應可省工役不急者所司查勘以聞厨役及押送
官如議

議覆五事疏

洪治七年五月欽天監天文生聞顯言五事

一謹齋戒惟大臣在衙門宿歇而屬官不至至者又或
飲酒不謹宜行禁約

一遵制書近在外布政司等官到京每年各以歷饋送或貨賣京民至以易食物輕褻國制乞行禁治

一觀天文六年十月庚辰二鼓東有星如雞蛋大青白色光起柳宿東行至近濁四鼓南有星亦如雞蛋大青色光起南河東河行至近濁尾跡炸散十一月甲辰夜三鼓太陰與司怪星相犯本監官將二雞蛋大星改作彈丸大大陰凌犯隱匿不奏且本臺官例與天文生上臺協同觀候多懶惰不行乞許天文生呈究

一明事例京官軍民勢豪之家奢靡相尚婚姻釀會率用大樣餅餠糖纏高頂獅人渾金衣服寶石首飾越禮僭分無所不至先年累有禁令未聞問發何人乞勅該部嚴加申明

一公考試兩京應試生儒人等舊例止許三千三百有餘司小試者拘此一縣或所取多不過七八人少不過一二人乞不拘以名數但文理平通者取之入試則人才無所遺下禮部議以為舊例京官大小俱齋宿者惟

大祀天地為然如太廟社稷等祭惟陪祭執事等官齋宿餘無所預今顯欲大小官凡祭皆一體齋宿紛擾難從其所言齋宿不謹聽科道并點閹官劾治欽天監進歷日頒行之後即分布內外各衙門蓋欲小民知畊作早晚之宜識吉凶趨避之道所宜遠近通傳監歷安能遍及以故每年各布政司歷流傳到京資助分布顯不諳大體輒欲禁革遂使公用之制書下同違禁之私物宜行天下凡監歷傳布出外及各布政司歷傳布來京

者俱勿禁中有貨賣及易物者許巡按巡城御史并五城兵馬捕治之內靈臺天象小者俱不該占候其言臺官上臺占候宜行本監查例遵守但靈臺郎李英擅圈註二雞字及本監叅顯假陳言以泄私忿俱當究問其言奢靡事宜申明舊禁如有仍前僭用違式者許科道官指名糾劾及該巡城御史錦衣衛五城兵馬司緝拏治罪各處鄉試因先年入場人衆難于供給俱有奏准定數遵行已久若不拘額數恐一時任意增添僥倖愈

多徒為紛擾上是其議令只照奏准及見例行顯挾私奏擾并李英刑部俱違治二次流星例不占奏仍令吳昊張紳具實以聞既而昊等伏罪上曰爾輩職專占候天象失於占奏法當治既伏罪姑宥之

陳五事疏

弘治十七年禮部尚書張昇等言五事

一禁侈靡謂服舍婚喪國有定制近年織異色花樣造違式房屋而京師尤甚今後請悉遵諸司職掌及洪武

禮制制度違者依律治罪

一重名器謂金蟒等衣非人臣常用之服今後內外官不許一概奏請違者許科道官指名糾劾治以重罪

一省供應謂光祿寺寄庫進素價銀乞發出補該寺之急以省民財

一併解納謂內府香料并太醫院藥材惟蘇松四川遼東搃解其餘皆陸續起解為害多端請自明年為始各該地方將額辦香料等物徵完在官差人總解

一裁冗濫謂近年添設通事過多貪冒之徒得以濫補
補後三年月有食糧之資實授序班歲有皂隸俸銀之
給及差送夷人復唆使沿途生事作弊為甚今後除一
國全缺該補外餘缺必總類十名以上方許奏行各邊
起取及行人大通事訪保庶僥倖之徒不致濫進得旨
卿等所言切中時弊省供應朝廷自有處置餘皆准行

覆行四事疏

隆慶元年御史王得春條奏四事

一清宮闈謂累年選入宮人充滿掖庭其中老弱幽閉者未免抑鬱愁怨有傷和氣宜悉簡出

一禁諂諛謂邇年多獻祥瑞以干恩澤脩極諛辭即有災異匿不以奏甚非憂治危明之意乞曉諭中外臣工毋得仍蹈故轍四方水旱疾疫寇賊奸宄即宜據實報聞

一慎題覆謂比來章奏繁多必該部秉公執奏明旨斷而行之乃為遵君命重主威之義近言官論事奉旨擬

議該部率多委曲遷就以致政令一下不知所守請
勅各部今後章疏是者即為覆行非者即與論罷不必
依違兩可以紊國是

一慎貢選謂近奉詔令用人毋拘三途誠為美意但歲
貢中沉淪日久壯志已墮似難責其策勵宜查覆選貢
例與正貢並行又宜慎選提學無尚虛名其取士不當
者即加顯黜禮部覆奏從之

覆十四事疏

禮部尚書沈鯉題為正學校宗節儉以隆聖治事該禮科抄出給事中孟養浩李汝華御史李天麟等各具題到部及諸臣條議未脩者逐一擬議上請伏乞聖明裁定勅下本部勒成書冊通行各直省撫按並提學官轉行各該府州縣查照題奉欽依內事理永為遵守施行等因

一明大義夫國家養士以學校而取士以科目者何為乎蓋鄉舉里選之制不可復不得已而觀人于言語文

字之間以求其賢與才者為國家用其大義本如是也
今之士不復如此義久矣父兄之教其子弟師友之相
為勸勉童蒙之習為誦讀者惟知取青紫榮身家為事
如古人之明體適用修己治人以畢吾性分能事者不
惟無其實而亦不知其名如是而欲人心吏治之復古
得乎合無將提學勅諭首一二條極切士習準有司衙
門戒石制度勒之貞珉豎于甬道使士子朝夕諷誦仍
刻為書冊廣布于里社小學斯人知為學大義而士習

可正吏治或可復古也伏乞聖裁

一重始進夫所謂始進者除童生送考生員起貢舉人
會試各照常規起送外至於生員科舉一得中式即有
民社之寄於稽覈更宜加詳且人數不多即品藻亦易
為力請令自今以後各省提學道於考試發案之日
即同各提調官及本學師生將取中科舉生員當堂逐
一審問如有犯該不孝不弟慢師傲長酗酒賭博出入
公門武斷鄉曲教唆詞訟包攬糧差舉放私債攜妓宣

淫營私保舉雜處下流卑污苟賤者許其指名開報當
即革退即以三等首名附二等之末補其額數仍照案
內次序取具五人互保一人容隱則四人連坐俱各不
准應試所在監臨御史遇該大比先于本年正月申飭
提學道及提調官務將科舉生員嚴行稽察仍不時體
訪果有行劣者即坐名行布政司及提學官革其應試
則始進以正而人知敦行繇此矣伏乞聖裁

一崇行誼查得近年提學獎率士類未嘗不諄諄以德

行為言而考藝論業亦未嘗不孳孳於窮經明理敦本
尚實之務乃士習卒不可變而尚德之風未有自學校
先之者則以其有名無實人不信服故也合無自今已
後凡提學出巡一到地方即將所訪行優行劣生員公
同提調等官多方叅問於合學諸生舉其與公論符合
毫無可疑者各量其善惡輕重分別賞罰務裨羣情快
愜的然可示勸懲不得虛應故事使人以為口實如是
已畢方另日考校文藝如賞過行優生員以文藝考居

劣等者免其降黜罰過行劣生員有年青而姑容肄業者雖文字考居優等止許給賞不許補廩幫增則一先後低昂之間即可以示崇尚之意而人不以為文具矣
伏乞聖裁

一督提調夫帝王平治天下大端惟治教養三事皆缺一不可者也國朝崇重教化載在律令會典到任須知及教民榜文等項條格者班班可考曷嘗不以教化為先務哉乃近年以來有司既視之以為迂濶而上司考

課有司者亦不據此以為殿最無惑乎風化不行而士
習日卑也合無行令撫按衙門申飭所屬司道開註有
司考語除操守外即以治教養分為三款各疏事蹟于
下三事俱備者為上考二為中一為下提學官出巡事
畢除自己觀風問俗興賢舉孝修明禮教仍專以教化
一事考課有司分別等第開報撫按以憑舉劾吏部行
取推陞亦據撫按所開以為上下至於作興學校則遵
照勅諭卧碑事理勤加考課或以本州縣編定季考銀

兩隨便動支以為獎賞之用伏乞聖裁

一社學之制創自國初不惟蒙養甚便且使窮鄉遐壤
庠序之教所不能遍者無不知有絃誦之音意至宏遠
矣惟近年有司不肯設署教讀或間設一二而各鄉不
遍及待不以禮者蓋里無其師而社學之廢也久矣夫
論文藝則生員為上論蒙養則教讀為專故小學之師
不但可置於里社即城市皆所宜設也合無行令各提
調官於在城坊廂在鄉村落量其民居疎密道里遠近

置立教讀名色給與方巾圓領免其雜派差役使專教
幼子弟先習小學與禮儀孝弟之事如有通曉文藝堪
以作養者亦許提調官於提學按臨之日附搭取中童
生一體選考其教習有法誨人不倦者歲終量加獎賞或
破格優免以示激勸伏乞聖裁

一鄉飲酒禮乃貴德尚齒之意故賓介雍容禮文揖遜
俾觀者有所興起至盛典也近來有司視為故事多將
考察去任衙門退役及為事犯罪之人為其子孫顯貴

或在冠裳之列徇情濫請有傷風化且辱盛典合無通行各該有司查照律令憲綱務要慎加推擇每次舉行之後即將所請職名逐一開送撫按及提學分巡道備加查訪果否允協輿情中間有無私弊其巡按御史及該道出巡之日遇該考察有司即以此為一事如有前項罷閒有過之人濫與鄉飲者追究原舉師生一併罰治有官職者與註劣考伏乞聖裁

一聖訓六言勸化民俗而設木鐸徇於道路則所以提

撕警覺之也近年以來此舉久廢合無行令各掌印官
查復舊制于城市坊廂鄉村集店量設木鐸老人免其
差役使朝暮宣諭聖訓伏乞聖裁

一鄉約之設所以訓民即古道德齊禮之遺意也為有
司者能鼓舞有術民未有不勸於善者宜於所轄地方
酌量道里遠近隨庵觀亭館之便置鄉約所以皇祖聖
訓大明律例著為簡明條示刊布其中即于本里擇衆
所推服者一二人以為約長使其督率里衆勸勉為善

掌印佐貳教官倣古巡行阡陌之意每月一次分投各所集衆前來聽講聖訓律例使各家喻戶曉講畢仍令約長舉報本里為善為惡之人及曾改過自新怙終不悛者而質于衆果無異同隨即登記簿籍分別懲勸如果年高有德者或旌以扁額或免其雜役或申准合干上司給與冠帶榮身以示鼓舞伏乞聖裁

一鄉賢崇祀載在令甲典至重也第舉行日久寢失初意有官以賄敗及居鄉不檢者往往緣子孫顯貴朦朧

混入有志之士羞與為伍冒濫之弊至今極矣合無今後督學官每歲終將所屬府州縣舉到鄉賢已准入祀者造冊二本申送部科以憑咨訪查考如有濫舉市恩不協公論即指名叅革以光祀典伏乞聖裁

一名宦崇祀以其在任能為百姓禦災捍患澤及一方故士民相與尸而祝之以報功也近來祀典太濫有等碌碌無聞民未見德一旦為其子孫見為顯官即與曲意阿承使得濫與俎豆之列殊可痛恨合無今後督學

官備查某人在任功績果否顯著人心有無翕服如果無碍方許送入仍照鄉賢例歲終一體申送部科查考不得曲徇私情致傷公道伏乞聖裁

一義夫節婦禮宜表揚據各處奏到甚多其中不無寒微沉滯而仕宦顯貴之家獨得先蒙褒表何以服人心而昭公道合無行令督學官於按臨考試之日即令各提調官將其境內節義應該旌表者即便具申案候仍予賞罰生員已畢舉其所申名氏面加諮訪不惟可見

的實亦免吏役阻勒致使寒微之家久為沉滯伏乞聖裁

一各處旌表孝行確當者固多其中容有名實不相副者蓋據一時之迹而未暇究其生平也今後除割股一事原有明禁無得概舉外其以廬墓等項推舉孝行者必其平素為人果能服勞奉養不致虧體辱親無間父母昆弟之言者方許題請表揚其有嫡孫承重能盡孝祖父母者亦許一體旌表伏乞聖裁

一婚葬宴會房屋車輿衣服首飾傘蓋器皿等項俱經本部遵照成憲題有定式又該都察院題刊憲約不啻三令五申矣乃風俗奢靡如故則倡率未至而禁令不嚴也合無行各撫按嚴督所屬有司約會境內士夫力行儉約以倡衆庶倡之不從則量其情之輕重罰穀備賑或陞其戶口則重其徭役以困辱之如有工匠人等造作淫巧與違式違禁之物者依律問罪以澄其源伏乞聖裁

一非鬼而祭人以為諂即當祀神祇與家廟祭獻禮固
不廢法亦當嚴邇來有等奸徒創立淫祠廣設齋醮謬
為長生禱嗣懺罪祈福之說以致無知小民聽從虛誑
不憚遠道攜挈妻孥焚香祭拜望空禱祝如白蓮無為
等教者誘惑愚頑釀成禍亂相應榜示驅逐永為禁革
伏乞聖裁

禮部志稿卷四十五

欽定四庫全書

禮部志稿卷四十六

明 俞汝楫 編

奏疏

聖政疏

隆重圖書疏

弘治四年大學士丘濬言臣前此上書欲將臣所進大學衍義補書中所載切要之務陸續陳獻奉旨卿欲有

言具奏來看臣見本書內備規制下圖籍之儲有云人君為治之道非止一端然皆一世一時之事惟所謂經籍圖書者乃萬年百世之事是皆自古聖帝明王賢人君子精神心術之微道德文章之懿行義事功之大建置議論之詳今世賴之以知古後世賴之以知今日也凡歷幾千百年而後至於我今日而我今日不有以修葺整比之使其至今日而廢墜放失焉後之人推厥所繇豈不歸其咎於我哉是以自古帝王任萬世世道之

責者莫不以是先務我太祖高皇帝肇造之初庶務草創日不暇給首求遺書于至正丙午之秋是時猶未登寶位也既平元都得其館閣秘藏而又廣購於民間沒入于罪籍一時儲積不減前代然藏蓄數多不無亂雜積歷年久不無鼠蠹經該人衆不無散失今內閣儲書有匱書目有簿皆可查考乞勅內閣大學士等計議量委學士并講讀以下官數員督同典籍等官撥於吏典班匠人等逐厨開盤將書目一一比較或有或無或全

或失或多或少分為經史子集四類及雜書類書二類
每類若干部部若干卷各類總數共若干要見實在的
數明白開具奏報又以木刻考較年月委官名銜為記
識於每卷之末立為案卷永遠存照臣竊惟天下之物
雖奇珍異寶既失之皆可復得惟經籍在天地間為生
人之元氣紀往古而示來今不可一日無者無之則生
人貿貿然如在冥途中行矣其所關係豈小小哉民庶
之家遷徙不常好尚不一既不能有所廣儲雖儲之亦

不能久所賴石渠延閣之中積聚之多收藏之秘扁鑰
之固類聚者有掌故之官闕畧者有繕寫之吏損壞者
有修補之功散失者有購訪之令然後不致於泯爛散
失爾前代藏書之多有至三十七萬卷者今內閣所藏
不能什一數十年來在內者未聞有所考校在外者未
聞有所購求臣恐數十年之後日漸損耗失今不為整
理將有後時無及之悔伏望體聖祖詔求遺書之心任
萬世斯文在茲之責毋使後世志藝文者以書籍散失

之咎歸焉不勝千萬世儒道之幸臣所進大學衍義補
一書其間條目雖多然皆一代一時之事惟此則萬世
之事故首以此上請而條列合行事宜於後

一自古藏書之所非止一處漢有東觀蘭臺鴻都等處
唐有秘書監集賢書院等處宋有崇文館秘書省等處
我朝稽古定制罷前代省監館閣掌書之官併其任於
翰林院設典籍二員掌凡國家所有古今書籍圖書之
在文淵閣者永樂中遣翰林院修撰陳循往南京起取本

閣所貯古今一切書籍自一部至有百部以上各取一部北上餘悉封識收貯如故則是兩京皆有儲書也今天下書籍盡歸內府兩京國子監雖設典籍之官然所收掌止是累朝頒降之書及原貯書板別無其他書籍其官幾于虛設請於內閣見存書籍內查有副餘之本各分一本送兩京國子監典籍廳收掌仍勅兩京內外守備大臣會同南京司禮監禮部翰林院官查盤永樂中原留南京內府書籍有無多寡全欠具疏奏知量為

起取存留分派湊補其正有一本無副餘者將本書發
下國子監勅祭酒司業行取監生抄錄字不必工惟取
端楷錄畢散各堂教官校對不許差錯每卷末識以謄
寫監生校對教官銜名其師生只照常例俸廩別無支
給挨次差撥如常合用刊字摺背刷印匠作及給筆之
費行各該衙門量為撥辦不限年月書成裝釘陸續送
兩監典籍掌管如此則一書而有數本藏貯而有異所
永無疎失之虞矣

一我太祖高皇帝聖德神功超出萬古帝王之上御極三十年多有制作皆出自宸衷御札非若前代帝王假手詞臣之比也今頒天下者惟皇明祖訓大誥三編大誥武臣資世通訓御製詩文雖已編輯刻板藏在內府天下臣民得見者尚罕今編類在內閣書目者有御註洪範御註尚書御註道德經文華寶鑑昭鑑錄外戚事鑑存心錄精誠錄省躬錄志戒錄永鑑錄忠義錄為政要錄彰善瘴惡錄武臣鑑戒醒貪簡要錄務農技藝簡

要錄女戒務本之訓等書是皆我聖祖精神之所運心
畫之所形手澤之所沾溉者也存之足以範百王垂之
足以鑑萬代其間雖或有成于衆手何者不本于聖心
若夫大明帝紀皇明寶訓大明寶訓洪武聖政記大明
日歷等書則又當時儒臣纂成卷帙者也今皆藏在內閣
天下臣民無繇得見臣竊惟帝王有我聖祖制作之一
二為其子孫者莫不寫之琬琰頒布天下傳之將來以
為父祖揚名而我聖祖之功之德萬世如見固不假乎

言語文字以傳然聖子神孫繼述之孝顯揚之心則有不容已者臣請勅內閣大臣督領翰林官屬將秘閣所藏已成編卷者逐一校對無差雕印頒行若其辭語近質不可行遠卷帙浩繁難以盡布請如洪武六年翰林學士詹同宋濂等纂集日歷以為寶訓事例倣唐人貞觀政要體製將前項書籍撮其旨要舉其宏綱分門別類以成一書命工刻梓頒布天下垂憲後世俾學校用以教人科舉用以取士朝廷用以資治則聖祖之聖德

神功與六經而並行同天地而長久矣

一漢唐宋創業之君承亂離之後莫不先收圖籍中世以後稍有散亡遺闕輒遣使分行天下括訪懸賞以購之授官以酬之雖以五代亂離之世尚且不廢況今百年承平內外無事國家猶有餘力採輯佛道之書以為藏經雕以良梓飾以文綾徧賜天下寺觀儲以髮紅函匱載以金碧輪藏况此儒家經訓書籍乃自古帝王傳心之要道經世之大典天地山川人物風俗之所存禮

樂刑政制度文為之所具烏可吝纖微之費而不為經久之計以遺千古之慨嘆哉臣請勅內閣將考校見有書籍備細開具目錄付禮部抄謄分送兩直隸十三布政司提督學校憲臣榜示該管地方官吏軍民之家與凡官府學校寺觀并書坊書鋪收藏古今經史子集下至陰陽藝術稗官小說等項文書不分舊板新刻及抄本未刻者係內閣開去目錄無有者及雖有而不全者許一月以裏送官其有王府處啟知借錄多方差人詢

訪設法蒐求期于盡獲無遺仰所在有司將各處贓罰
紙劄并給官錢借辦筆墨之費分散各處儒學生員謄
寫惟取成字不拘工拙但不許潦草失真就令各學教
官校對既畢以原本歸主不許損壞不還其所得書目
先行開具陸續進呈通行各處互相質對中間有重複
者止令一處抄錄錄畢裝成卷帙具本差人類解赴京
一自古帝王藏國史於金櫃石室之中蓋以金石之為
物堅固耐久非土木比又能扞格水火使不為患有天

下者斲石以為室，錮金以為櫃。凡國家有秘密之記，精微之言，與凡典章事跡，可以貽謀傳遠者，莫不收貯其中，以防意外之虞。其處心積慮，可謂深且遠矣。後世徒有金櫃石室之名，而無其實。典守雖設，官藏貯雖有所，然無禦災備急之具。不幸一旦有不測之事，出于常慮之外，遂使一代治體事功，人文國典，因而散失。後之秉史筆者，無所憑據，往往求之於草澤，訪之於傳聞，簡牘無存，真贗莫辨。非無大功異政，不得記載，而明君賢臣

為人所誣捏者亦多有矣是以古之君子憂深思遠者
恒於無事之時為先事之慮當平寧時無故而為急切
之語固若不識忌諱者然原其心則不失為忠愛之深
也仰惟我朝得國之正三代以來所未有也列聖相承
承平百餘年聖德神功如天地日月巍乎煥然所以傳
之天下後世者惟賴乎實錄之書今內閣所藏者太祖
高皇帝實錄一部二百五冊寶訓十五冊太宗文皇帝
實錄一部百三十四冊寶訓十五冊仁宗昭皇帝實錄

一部二十一冊寶訓六冊宣宗章皇帝實錄一部一百
十六冊寶訓十冊英宗睿皇帝實錄一部三百六十一
冊寶訓十二冊憲宗純皇帝實錄一部二百九十三冊
寶訓十冊與夫藏在內閣每朝又各一部此外別無他
本矣夫既無金石藏書之具又無名山藏副之制臣愚
過慮欲乞朝廷于文淵閣近便去處別建重樓一所不
用木植專用甃石累砌為之如民間所為土庫者收貯
緊要文書以防意外之慮乞勅內閣儒臣計議督令內

閣辦事中書舍人等官遇其理辦本等文書稍有暇隙不妨本職分寫累朝實錄各一部不限年月書成盛以銅櫃度於樓之上層凡內府衙門收藏一應干係國家大事文書如玉牒之類皆附焉其制勅房一應文書如詔冊制誥勅書等項草檢行禮儀注應制詩文等項底本前朝遺文舊事等項雜錄亦令書辦官員遇暇陸續抄錄不限年月書成盛以鐵櫃貯於樓之下層凡內府衙門所藏文書可備異日纂修一代全史之用者如永

樂以前文武貼黃之類皆附焉如此則祖宗之功德在萬世永傳信而無疑國家之典章垂百王通沿襲而有本矣議者謂文書浩大書辦人員數少歲月易邁何時訖功臣請樓成之後先將合貯文書之見有者權寘其中待後陸續寫完新本易出舊本仍貯故處以備考用太宗皇帝當多事之秋猶聚衆千百纂集永樂大典以脩學者考究以此方彼孰重孰輕伏乞睿照

一藏書之所分為三處二在京師一在南京則是一書

而有二本不幸一處有失尚賴有二處之存其在國子
監者如內閣例盛以厨櫃寘于典簿廳載道所中責付
典籍掌管祭酒監丞等官時常提調監護然惟掌其外
門之鑰及為水火盜賊之備而已若夫厨櫃鎖鑰則收
在內閣每歲三伏日如宋朝曝書給酒食費之類先期
奏請翰林院量委堂上官一二員偕僚屬赴國子監曬
晾書籍因而查筭畢事封識扃鑰歲以為常南監鑰則
付南京翰林院掌印官收掌其曝書給酒食亦如北監

之例皆不許監官擅自開櫃取書觀閱并轉借與人內外大小衙門因事欲有稽考者必須請旨違者治以違制之罪疏入上從之

請便殿親政疏

隆慶元年禮部尚書高儀等言人君紹極繼先統乃天命維新之會臣民觀化之時惟我皇上嗣登寶位已四月于茲矣一時羣臣感遇昌期胥竭忠款猷謀入告惟恐或後如大學士陳以勤首先效納條為十事以為聖

明保大嗣服之助已蒙溫旨嘉納其他科道官有論奏亦各奉有俞旨臣等詳閱諸臣之疏中間條例雖有不
同至於請御文華殿見輔臣面加詢問親決庶政一事則甚有裨於聖治今日要務信莫有先於此者臣等切
惟唐虞君臣萃聚一堂都俞吁咈情意罔間其導下之言也則曰予違汝弼又恐其不盡言也則曰汝無面從
所以君臣道合血脈流通古今稱盛治者莫及我朝列聖相承每每接見輔弼延訪大臣或同遊咏或燕對無

時明良善具庶事成熙國家萬世太平之業端肇於此
惟我皇上登極數日即出御門朝宁威儀已復祖宗之
舊但大庭之上體統森嚴拜起唯諾勢相懸隔如止循
例具文上有懷而不得下問下有見而不敢上陳竊恐
情意既不相接見聞不免日壅諸司奏牘中外事機豈
能一一盡白於聖衷今山陵已畢典禮就緒經筵日講
復賜舉行惟便殿親政尚未之及伏望皇上仰藉列聖
之盛典俯納諸臣之忠言自今開講以後每日朝罷即

御文華殿除內閣輔臣日侍講讀自宜墮入供事其六部都察院大臣仍乞皇上不時名見即將覽過題奏干係大賞罰大黜陟大典禮大刑獄大軍機大會計與凡一切大政令當斟酌詳議者特降清問許部院官陳述始末內閣輔臣即擬可否皇上加以睿斷親賜裁答倘有疑難雖再三商確然後答旨亦無不可科道掌印官每次各留二員隨進如諸臣陳述未詳擬議未當者許公同評正至於輔臣講讀之餘仍乞皇上親發玉音咨

詢治道或以章疏應票者令即在御前看詳面請宸斷
如此則萬幾之理日熟於聖衷四海之內可運諸掌上
矣上報可

祀典疏

議覆南京祀典疏

成化八年南京太常寺少卿劉宣言自古聖帝明王未
嘗不謹於祀事我祖宗定鼎金陵百祀具舉及北都以
後南京祀典或存或廢禮制亦多蹈舊襲訛而未脩者

謹條陳十二事

一太廟自太祖以上五廟帝后冠服寶座皆全太宗有冠服而無寶座文皇后則俱全仁宗宣宗止有寶座無冠服昭皇后章皇后及英宗寶座冠服俱未備斯蓋太宗在御文后已入太廟英宗嗣位兩宮尚享孝養遂致因循禮制偏廢乞先成寶座徐請列聖遺衣奉安

一孝陵等祭專命駙馬都尉趙輝先師孔子主祭專命國子監祭酒或代以禮部堂上官假令臨期有故不及

奏請欲更他官則未有成命請于五府六部大臣內各增一員遇有事故即代行事

一北京都城隍每歲郊祀及祀太歲等神皆得祔祭五月十一日復遣太常寺官祭於其廟今南京都城隍則二祭俱無夫神護衛生靈兩京既無不同報祀之典宜無或異請如北京例祭之

一我朝準古祭用太牢然必小犢者蓋取爾粟義也今南京內外諸司動以牛小答責養牲者殊戾禮制

一孝陵祭凡文武官無大小皆當與而諸司近不赴請以御史稽其怠惰

一郊祀地軍民多縱畜牧其中請勅守臣重加禁革

一本寺例薦新八次所載品物多不踰百斤而黃船重

大是致沿途膠淺往往後期宜更造小者庶幾便于速

達

一歲祀黃蠟例取之內帑勞弊滋多宜即附近州縣辦

納為便

一每歲解到供祀牲多因賃地窄小加以投牒淹留致損瘠宜暫處之于犧牲所以俟驗收

一功臣廟壁高皇帝具圖諸將戰功蓋示創業艱難于后嗣近漸磨滅請完飾之復略疏其事刻其圖以報使上而九重遠而四海悉知祖宗垂裕之心崇報之盛

一本寺厨役數不過三百而汛掃郊廟十餘處月必三次况大小祭祀歲無虛日亦頗効勞故例人月給米六斗有家屬者一石後俱減其數而無養贍致多逃亡又

此役之出上元江寧二縣者止十餘戶故例得復其家所以重祀事今有司多不循舊例往往雜役之請俱仍優免如例

一神樂觀樂舞生數甚寡近以未受度退閒者五六十人請不為例悉與之牒俾相繼補充事下禮部會議詔祖宗已尊祀于京師太廟寶座未備者增之冠服不必再設功臣畫壁仍舊都城隍太常寺其以八月中旬歲祭餘俱允行

議祀典三事疏

弘治四年南京左通政鄭紀言三事

一古者天子有鼎獻數因之我朝太廟所行似近簡略
今擬初獻乞皇上自行徧詣皇祖考前連進三爵畢則
讀祝復位亞獻皇太子長成親王未之國者代之否則
貴戚大臣亦可終獻則貴戚大臣或內閣儒臣亦可每
獻數皆如初禮庶可以彷彿古人之九獻矣

一孔子祀尤宜崇重自憲宗朝以祭酒周洪謨言邊豆

加十為十二侑數加六為八與十二冕服相稱崇重之意至矣但不加帝號者謂夫子周人當用周制其所謂王乃天王之王非國王之王恐未為通論夫孔子雖生於周而封王實始于唐周無帝號故有天王之稱唐既有帝號則當時所謂王不過國王而已使孔子封於周目為天王可也既封于唐烏可以周制誣之邪乞推憲宗崇重之意易其王名加以帝號不然則章服禮樂又已僭用何以安先師在天之靈乎

一聖賢之教莫先于明人倫而人倫莫先于父子顏淵
曾參子思實顏路曾皙孔鯉之子子坐殿上父列兩廡
恐事死如生之道不如是也縱三父壓于聖門之品第
限于歷代之封命無所顧望其三子之心安乎今國子
監文廟戟門傍北向之屋宋元以來從祀諸儒多坐其
中乞移置于兩廡之末東西相向而以路皙鯉牌位補
其處通行天下皆倣此制既于孔子偏正不相妨又于
配哲尊卑不相壓庶公私恩禮兩盡而無嫌矣疏入下

所司知之

議飭孔廟祀典疏

弘治十二年十月刑科給事中吳世忠以闕里災言六事

一孔子為萬世帝王之師固當祀以天子之禮今禮用天子而號猶稱王說者謂孔子周之陪臣故當稱王而不當稱皇稱帝不知尊卑之名惟君所命乞加封曰文祖大成至聖帝庶稱尊之典無遺憾矣

一子雖齊聖不先父食今顏子曾子子思既在配享之位而其父顏無繇曾點孔鯉猶列兩廡子食於前父食於後子諱其姓父稱其名使三子有知必不享其祭今孔廟正殿後有啟聖殿乞以無繇點鯉為之侑後來儒者之父如程珦朱松亦得列於其次封謚儀物一視其子祭祀以二丁前一日行禮

一宋升孟子曾子子思於配享而十哲之數不升有若而升子張近代及我朝黜王安石揚雄而淫侈之馬融

奢濁之范甯猶未之黜乞於十哲去子張而升有若於
兩廡如公孫龍公伯寮荀况王弼之徒亦所當去而融
甯二人則決去之

一程朱之後如上蔡之謝良佐洛陽之尹焞藍田之呂
大臨建陽之游酢蔡元定劔浦之羅從彥延平之李侗
金谿之陸九淵閩縣之黃幹龍溪之陳淳清江之張洽
邛州之魏了翁金華之何基王柏元容城之劉因國朝
宗仁之吳與弼河東之薛瑄其道其功視程朱雖不及

至其平生刻苦動依聖訓視唐太宗所升漢晉諸儒匪直無愧而已乞各令從祀於其鄉學必欲有所分別則以侗從彥餘并祀於郡學尤善

一各處文廟多損壞祀禮苟簡乞令有司修整每四位共一龕每一龕共一几簾幙常垂門戶常鎖非朔望行香不得擅開

一國學之外禮樂罕行乞依國學樂舞之器與聲容節奏之數刊為圖說頒布各學選學舞生寄籍道觀食以

公田令其能者互相教習二丁之祭所在舉行使窮鄉下邑得覩禮樂之全命下所司知之

釐正從祀稱號疏

正德元年兵部郎中何孟春言陛下紀元開治之初舉
幸學崇儒之典顧先聖稱號未極尊崇諸賢從祀有當
釐正者宜下所司詳議

一孔子廟祀漢晉及隋或號先師或稱先聖宣尼宣父
不越公稱至唐玄宗始諡為文宣王宋真宗加至聖元

成宗加大成國初未有改也宋真宗常詔禮臣定議為
帝李清臣曰周室稱王陪臣不當為帝其事遂止夫孔
子道配天地為萬世帝王之師何疑于周陪臣而清臣
徒以位言之必如所言公亦不可稱矣或又曰周天子
稱王孔子周人而稱王是即尊以天子矣不當再改稱
帝夫自秦漢以來天子稱帝而分封其宗支臣下有功
者為王蓋以王卑帝尊迄今然也則所以帝孔子者又何
必泥於周制哉况享祀八佾至我憲宗皇帝益之百代

之下誰敢異議此追尊為帝之典重有望于今日也

一孔廟配享以前惟顏子一人東漢雖嘗祀七十二弟子不出闕里唐開元追贈十哲及七十子爵號天下始並從祀按史記列傳七十七人索隱曰家語亦七十七人史記有公伯寮秦冉鄒單家語不載而別有琴牢陳亢懸豐當此三人之數然今世傳家語止七十七人史記所有鄭國申黨顏何家語不載而載薛邦申績又史記之所無杜佑通典載開元贈典自史記七十七人外

增入遽瑗林放申棖陳亢琴牢琴張六人宋祥符大觀
中去琴牢餘並因之懸豐今家語作懸亶字子象禮記
檀弓篇縣子疑即其人而今祀典不及焉家語薛邦字
子徒申績字子周史記載鄭國申黨同字此則邦即國
也績即黨也論語釋文申棖鄭康成云蓋孔子弟子申
績史記云申棠今以棠為黨以績為績其為論寫無疑
後漢王政云無申棠之欲是以棖為棠也索隱謂文翁
圖有申棖今圖有黨無棖是以黨為棖也唐宋加封申

黨申棖俱列從祀二棖猶二琴也薛邦鄭國姓氏頗遠
不祀薛邦而二申並祀不已瀆乎乞補贈懸亶列諸從
祀而削重祀者以改正數百年之缺典謬若公伯寮乃
季孫之黨非孔子弟子蘧伯玉孔子之所嚴事不當在
弟子列宋儒嘗辯其誤臣亦謂不當祀夫弟子姓氏莫
可信于家語執家語以定封祀復有前失哉

一儒先從祀孔廟起唐太宗以左丘明等二十二入代
用其書垂于國胄故于太學祀之卜子夏聖門高弟此

不暇論左丘明公羊高穀梁亦有傳經之功非世儒可擬若高唐生而下一十八人其所述作不越掇輯訓詁而已而俱在脩食蓋當時所取者在是故漢有醇儒如董仲舒而不及焉子書公孫尼子漢志以為七十子之弟子隋志以為孔子弟子史記云樂記公孫尼子次撰李善文選注載沈約云樂記取公孫尼子馬總意林引劉瓛曰緇衣公孫尼子所作其言可補六藝之文有功於聖經蓋不啻公穀比而親授業於孔子之門人唐

宋封爵俱不及者失之不詳考耳然視戴聖之徒相去遠甚忽立言之人弗祀而祀諸傳錄訓解其言之人事理不倒置乎董仲舒至我太祖始加封從祀英宗朝胡安國蔡沉真德秀吳澄之祀旅舉焉則懸亶公孫尼子之封祀亦宜有行於今日也下其章於禮部

郊祀二祖並配議

嘉靖十年禮部尚書夏言奏臣於三月十一日節該欽覲聖制南郊祀天北郊祀地以二至日行事臣無任慶

幸以為天地合祀南郊自東漢以來歷代循襲朱子所謂千五六百年無人整理而陛下今日獨破千古之謬一旦舉行誠可謂建諸天地而不悖者也又伏覩聖制南北二郊俱以我皇祖高皇帝奉配仍于歲首祀上帝于大祀殿以我皇祖文皇帝奉配臣無任慶幸以為虞夏殷周四代之郊惟配一祖後儒穿鑿分郊丘為二祭及誤解大易配考孝經嚴父之義以至唐宋變古乃有二祖並侑三帝並配之事宗周典祀隳棄蕩然而陛下今

日獨觀萬化之原一旦更定誠可謂質諸鬼神而無疑者也夫天地合祀之非與祖宗並配之失一也漢唐而下天地之祭或分而復合合而復分祖宗之配或正而復失失而復正中間大儒名賢之論未嘗不確有定見而時君世主膠於淺陋疑於信從使郊祀大禮卒不得以大明於世此聖人之所以難逢而大道之所以日隱也恭惟我皇上以天縱之聖挺生千載之後而一旦為此度越百王之舉誠可謂考諸三王而不謬百世以俟

聖人而不惑者也奈何今日禮官廷臣乃猶或依違疑沮於其間臣誠不知其可也昨于十日禮部會官於東闕集議尚書李時首言天地分祀南北郊聖諭已定無容議矣惟太祖太宗功德並隆並配天地已久今宜仍舊大祀殿及園丘方丘俱當以二聖並配于時臣應之曰聖諭以太祖配天太宗配上帝正是各全其尊天與上帝一也因是功德並隆故皆得配天非有差等大祀殿並配則兩失其尊矣臣不敢擅議宜從聖制萬一遷

就猶為非禮若園丘方丘俱配二祖則是今日之失况是我皇上肇建大禮豈可重貽後人之議臣不敢從於是尚書方獻夫贊之曰言之言亦是兩郊之配今日新禮也當求至當李承勛亦贊之曰是宜以兩請議上以俟宸斷羣臣次第畫題臣亦畫題而退自是不知禮官議奏云何然疏上今九日矣不奉明旨連日外間傳聞少傅璉大學士鑾聯翩上奏必欲二祖並配臣不勝疑駭初意聖制以明示在廷得禮之正無容喙矣及久

侯聖者不下竊恐聖心亦不免於疑疑則不免於改制
矣萬一有是則違經叛禮貽譏萬世非細故也臣敢昧
死為陛下陳之臣謹按孝經郊祀后稷以配天宗祀文
王於明堂以配上帝春秋傳曰自外至者無主不止則
天地之祭必有所配者皆侑神作主之意也且對越天
地神無二主禮專一配所以奉天帝之尊明不敢瀆耳
稽諸神理其不可並配一也且三代兩漢之盛莫之敢
易西漢以高祖配天東漢以光武配上帝義亦正矣唐

初始有兼配之事垂拱中禮官希旨郊丘諸祀遂有三祖同配之禮開元十年明皇親享園丘禮官建議遂罷三祖同配宋至道三年詔書親郊園丘以太祖太宗並配至景祐二年詔禮官詳按典禮辨崇配之序仍以太祖定配嘉祐六年諫官楊畋論水災繇郊廟未順禮院亦言三祖同配非禮翰林學士王珪等曰推尊以享帝義之至也然尊之不可以瀆故郊無二主今三后並侑欲以致孝也而適所以瀆乎享帝非所以寧神也請如

禮官議七年詔南郊以太祖定配司馬光曰古之帝王自非建邦啟土及造有區夏者皆無配天之文故雖周之成康漢之文景明章其德業非不美也然而子孫不敢推以配天者避祖宗也光之言可為萬世訓矣此漢唐宋之故事如此考諸往牒其不可並配二也禮曰父坐子立孔子曰事死如事生又曰祭之以禮今太祖父也太宗子也然則太祖在御之日我太宗敢與並坐否乎以分則父以功德則肇基受命之祖我太宗建北都以

垂子孫萬世久安長治之業功則盛矣然克平僭亂混一區宇掃彌天之寇以復我中國帝王所自立之天下而全付於聖子神孫者則太祖之功德又振古帝王之所無也今以父子之間連袞並席尊卑不協于序幽明不通于理豈所以安我太宗之心乎豈所以安我太祖之心乎豈所以安我皇上之心乎揆之倫理其不可並配三也且聖諭曰朕原因缺祀天報本之典故所為問當遵復皇祖之始制露祭于壇方合古先聖王之意以

盡事天之本又曰人君祭天乃報本之祀大哉王言真
洞達禮樂之本矣程子曰萬物本乎天人本乎祖故冬
至祭天而以祖配之以冬至氣之始也是故人本一祖
也萬物本一氣也寧有二本乎哉若以二祖並配則失
一本之義矣先儒陳氏曰古者祭天于圜丘掃地而行
事器用陶匏牲用犢其禮極簡聖人之意以為未足以
盡其意之委曲故有大享之禮焉此周家明堂之祭所
繇起也天即帝也郊而曰天所以尊之也故以后稷配

焉后稷遠矣配祭于郊亦以尊稷也明堂而曰帝所以親之也以文王配焉文王親也配文王于明堂所以親文王也尊尊而親親周道脩矣故郊者古禮明堂者周制也周公以義起之也欲尊文王而不敢以配天者避稷也此周事然也今陛下覽觀古昔更定大禮正允合於宗周之典是故奉我太祖配天于圜丘則周后稷配祭于郊者也所以尊太祖也奉我太宗配上帝于大祀殿則周之文王配祭于明堂者也所以尊太宗也二配

至重萬世不遷之法也豈有抑揚輕重于其間哉故並配則各失其尊分配則各全其尊矣臣不知議者又何所疑也以臣觀之所謂聖人復起不可易者也建百王不易之盛典垂萬世無疆之令名則堯舜禹湯文武周公孔子在天之靈我太祖太宗列聖在天之靈我恭睿淵仁寬穆純聖獻皇帝在天之靈無不慰悅下至濂洛關閩諸大儒及我國初定禮諸臣歿而有知亦將含笑于九泉之下臣雖死之日猶生之年也惟聖明留意焉

天下幸甚萬世幸甚

覆宗祀疏

萬歷元年禮部題該陝西道御史李頤題前事奉聖旨
該部知道欽此抄出到部案查先該浙江僉事辛防奏
將宋儒何基王栢元儒金履祥許謙封爵從祀該本部
議得止應比照楊時事例主祠鄉郡春秋祭祀覆奉欽
依准行翰林院定擬正學祠額撰造祭文施行外又查
得浙江巡按謝廷傑奏要將已故尚書章懋附祀正學

祠內該本部覆奉欽依准令從祀去後今該前因看得御史李頤題稱要將先儒胡居仁從祀孔廟御史陳文燧并請將先儒吳與弼陳獻章及元儒吳澄議會從祀式照章懋事例從祀其鄉各一節臣等考之周禮士之有道有德而教于學者沒則為樂祖祭於宗鄉先生沒則祭社雖褒崇之典不同其於表章先哲翊揚風教均之為世勸也謹按先儒吳與弼博洽典文沉潛義理含真守素意絕軒冕之榮砥行礪躬動遵聖賢之矩陳獻

章質本超凡學惟主靜潛心理道悟泗上之微言脫迹
聲華邁潁陽之逸軌胡居仁涵養真純踐履篤實讀書
談道履潛隱而名益彰慎獨省躬身當俯而志不怍之
三儒者懿行嘉言有功名教清節直操足振頹風真可
謂儒者之高蹈盛世之逸民顧從祀孔廟典禮重大姑
俟論定而建祠鄉社以示褒重似宜舉行既經御史李
頤陳文燧具題前來相應議擬題請合候命下將吳與
弼陳獻章胡居仁轉行各原籍有司比照章懋事例建

立祠宇春秋致祭如各原籍曾私建祠宇即行修葺不
必重建仍移文翰林院定擬祠額撰造祭文以稱表揚
至意再照元儒吳澄寤寐程朱鑽研經史倡絕學于將
湮振斯文于幾墜究其出處大致迹亦可原考其著述
微言功不可泯即今從祀之典奉有世宗皇帝明旨已
經議革難以復議所據崇祀其鄉亦屬相應合無照例
一體遵行庶後學建興而于風化亦有裨矣伏乞聖裁
奉聖旨是

禮部志稿卷四十六